

拜石山房詞鈔



叢書集成初編

(補印本)

拜石山房詞鈔

一九四〇年六月初版
一九六〇年五月補印

顧 翰 著 作

商務印書館出版

上海洪興印刷廠印刷

重刻拜石山房詞敘

蕙塘先生。吾友許君邁孫少從受詩學者也。先生偃蹇乙科。沈淪下僚。卒以簡書中吏議。蕉萃于晚歲。慳而得歸。竟死于寇。有識哀之。先生蚤飲香名。詩篇深美而閎約。五言善者。妙絕時人。雖登選樓。亦亡愧色。刻意填詞。思旨高迥。聲哀厲而彌長。又未嘗不折衷柔厚。使人識安雅之君子。與楊伯夔唱和。而清轉華妙。反復勝邪。先生詞卷。近無錫有重刻本。皖浙之士求而未過。讀者衆。老成逝矣。遺書如綫。邁孫篤念師資。手自讐校。覆刻于榆園。少陵云。今茲弟子。亦匪盛顏。流離頓挫。夫有所受。觀舞劍器。吾且爲邁孫賦之。光緒戊子冬。仁和譚獻。

敘

詞盛於宋代。自姜張以格勝。蘇辛以氣勝。秦柳以情勝。而其派乃分。然幽深窅眇。語巧則纖。跌宕縱橫。語拙則淺。異曲同工。要在各造其極而已。辛巳歲。汪丈白也。見示七家詞選。獲讀蕪塘先生所爲綠秋艸堂詞。穆羽均調。奇弄迸發。深辛竹垞。迦陵而後。克有嗣音。乃駒光勿勿。星紀一周。良覲未申。瑤想時結。客冬省視來皖。始通謦欬。見其造裏覓遠。著語幽微。花魂自清。鶴影能瘦。半面之接。得慰乎輞飢。一夕之譚。若醉乎醕酎。坐次出拜石山房詞藁。索敘于予。予以蟹掌空腹。螢燭微明。蘭言渺通。藻辭奚飾。然而芳艸被阪。人知其香。鳴禽在天。衆聞其響。流連今昔。烏能無言。夫意以曲而善託。調以杳而彌深。始讀之。則萬萼春深。百色妖露。積雪縞地。餘霞綺天。一境也。再讀之。則煙濤瀕洞。霜飈飛搖。駿馬下坡。泳鱗出水。又一境也。卒讀之。而皎

皎明月。僊僊白雲。鴻雁高翔。隊葉如雨。不知其何以冲然而澹。脩然而遠也。至其興遑無際。思來不窮。夜雨紅樓。秋風白紵。鬢絲禪榻之傍。淒迷詩夢。歌扇舞衫之地。振觸酒懷。春影鏡中。淚痕衫上。一聲一咽。亦怨亦愁。卽其變徵之音多。益覺么弦之和寡。又況古情橫集。遠緒孤牽。東泝曲江。西經隴水。南浮吳楚。北陟幽燕。懷鉛握槧。采九土之異言。接席撫塵。交四方之奇士。敲殘銅斗。擊碎唾壺。何止賦景蒼茫。體物瀏亮。爲足拓眼底之屏山。酌心頭之井水平。冷趣相洽。清詞載搜。洗其淫哇。濯以藻麗。旣昭藐而蕩氣。亦芬芳而悅魂。凡姜張清雋。蘇辛豪宕。秦柳妍麗。固已提袂而合唱。無俟改弦而更張已。僕與先生忝附忘年之交。側聞聲音之道。畫荅選譜。振鐸吹秋。顧曲花間。賞心弦外。與之味東澤之綺語。參石門之香禪。雖略解蟲雕。頗知狸別。當不以牛鐸之音。詫非同調也。道光甲午春仲上元。蔡宗茂謹敘。

拜石山房詞鈔卷一

無錫顧翰兼塘著 仁和許增邁孫棨

菩薩蠻

輕陰閣住瀟瀟雨。莫教一霎春歸去。花杪小紅樓。有人樓上頭。卷簾人不見。放出雙飛燕。低首自尋思。微風動鬢絲。

高陽臺

題羽素女兄綠梅影樓填詞圖

折竹敲風。幽泉浣雪。詞仙合住高樓。暝坐圍鑪。疏香飛過銀鉤。凍雲一片寒無鶴。只苔陰古石痕留。傍檐牙。瘦影交橫。似到羅浮。圖中依約尋詩路。記左芬才調。妙句頻搜。花底閒吟。花邊艾蒨忘收。新詞譜上銀光紙。問何如綴向釵頭。願年年。綠萼開時。常侍清游。

蘇幕遮

偕蘭厓竹畦游澗谿。行荷香柳影中。數里不絕。竹畦取摩詰
田家詩意作圖。余與蘭厓各賦一闋。題其上。

上栽桑。低種芋。擬向谿頭。跨箇烏犍去。纔聽一聲鳩。嬾語。煙翠濛濛。
又下如毛雨。竹扉斜。茅屋古。楊柳陰疏。更有荷花補。水調風吹歌
正苦。隔巷何人。打起青腰鼓。

西江月

已過清明挑菜。早先穀雨烹茶。小桃花下那人家。曾記分錢白打。
遺卻翠鈿何處。畫檐低墮松釵。暝風晴日可來邪。剛折秋千一架。

湘春夜月

錦樹林訪卞玉京墓

澹斜陽。山棱翠未全荒。堪念撥拂葵衫。瀟灑道家妝。便取玉京私諡。

柰松風樓閣。仙夢茫茫。看煙橫墓石。舊時題字。瘦不成行。鉛華都
浣盡。問梅邨老去。誰擅詞場。座後名花。總難銷。馬鞍春塢。一片幽香。
棠梨莫雨。知柔柔。怎處淒涼。還應勝。西泠坏土。只游塵飛遠。不近鱸
塘。

點絳脣

步上苔茵。湘裙百褶羅羅水。無人結佩。自拾蘭皋翠。曲折闌干。倚
後新紅退。心如醉。熏人花氣。花也扶頭睡。

浣谿紗

往事思量總惘然。緣何愁緒上眉端。五更殘夢最難圓。淺色羅衣
如紙薄。只禁輕暝不禁寒。憐他微雨倚闌干。

木蘭花慢

題金粟道人小象

誰招金粟影。摹繭紙。展雅又。羨快意生平。異書奇士。更有名花。占取
玉峰高處。有蒼蘿。窈窕白雲遮。幽沼曾名春艸。小亭別署秋華。堪
嗟。鞍馬洛陽街。結客滿天涯。恁斜日園林。隔江烽火。愁聽哀笳。未辦
一邱埋骨。是青山。到處便爲家。我亦櫟鞵桐帽。只應投老煙霞。

南鄉子

秦淮水榭書所見

花外聽鳴鳩。好座秦淮小畫樓。樓上夕陽樓下水。回頭。人約疏簾正
上鉤。落葉滿銅溝。縱有脂香也不流。應爲玉關霜訊早。空候。帶有
風沙出塞愁。

高陽臺

題袁蘭邨少府南園春夢圖

穉柳飄煙。香莎溼雨。玉絲低窄簾紋。賸粉零星。東風不返桃魂。前塵

惆悵原如夢。怪當年夢也如塵。認闌干。色退輕朱。尙帶愁痕。桐廊
記得彎環路。恁者番重到。兀自傷神。眉語句留。能銷幾箇黃昏。綠窗
縱守羅衾待。怕秦篝冷了餘熏。正緇枝。一點玄紅。吹過斜門。

清平樂

翠陰如埽。衰柳長干道。扣上綠窗金了鳥。總有閒愁飛到。夫容照
影荒渠。鏡中蕉萃如余。空自朱樓臨水。頻年不見雙魚。

滿庭芳

題汪紫珊太守碧梧山館填詞圖

簾額棲雲。窗眉晝暝。碧梧未老疏煙。新蟬乍蛻。嘶斷已涼天。吹過一
番小雨。桐花影。冒上琴絃。移竹榻。片時支枕。隨夢到秋邊。俗塵都
洗卻。愔愔綠暈。飛補苔錢。看飄來幾葉。好替蠻牋。怪底都霜吟翠。溟
濛處。爲有詞仙。閒凝竚。西南樓角。瞥見月初弦。

虞美人

書寄伯夔

短屏只畫瀟湘雨。屏底涼如許。陰陰芳樹綠窺門。便是不看秋草也銷魂。未灰心事沈香火。獨傍香篝坐。秣陵天遠夢都無。聊寄一行病柳帶蟲書。

憶秦娥

花陰淺。青琴三尺橫羅薦。橫羅薦。冰絲未上。玉塵一面。眼波冷被霜風翦。簾前望斷秋無雁。秋無雁。擣衣聲裏。月華如練。

慶清朝

題葉小鸞疏香閣眉子研拓本

翠帙風吹。銖衣月冷。碧城人去迢迢。小研微凹。幾絲猶澆松膠。句取煙魂一片。向綠窗。展玩似寒蕉。銀鈎字。芳名宛在。茗玉曾瑯。爲念

嬋娟多病。料生來慧業。卽是愁苗。暫謫塵寰。肩同寫韻文簫。只恐秋蛾蹙損。黛螺分影舊痕銷。傷情處。櫻桃花落。疏雨瀟瀟。
研刻開一

到清琴第
幾弦之句。

鵲踏枝

簾額春陰生曉翠。一寸銀鉤。搖漾如空水。春色可憐無可柰。桃花濃笑。楊花淚。細拾殘香塗粉壘。學絮春愁。燕子何曾睡。鏡面塵昏如鏡背。鏡中人影添蕉萃。

沁園春

晚虹同蘭厓賦

極目高空。暝色蒼然。長虹下垂。怪蔚藍天上。忽連複道。琉璃雲畔。偶倚斜梯。雁背風輕。鳩邊雨斷。卻映遙山翠桁低。關心處。怕春晴畫苑。乾到花泥。才入賦後雌霓。想縱有。知音見面稀。只纖纖如此。腰圍

易減。懨懨似我。渴病難醫。一氣香煙。同心采縷。便化秋鸞不隻飛。蓬
瀛淺。只煩伊橫跨。不誤幽期。

思佳客

秋日齋居卽事

山閣秋晴葉擁階。竹風容易做秋懷。荒雲一研分泉洗。閒做元和折
脚釵。安茶白。度詩牌。葵花香刈作清齋。車塵埽斷門前迹。只許幽
人印艸鞵。

菩薩蠻

曲院煙光明一片。銅溝幾折流清淺。涼透薄羅重。芭蕉葉葉風。分
來紅影皺。細畫銀鉤瘦。紈扇不禁秋。書成墨亦愁。

高陽臺

將游武林。留別楊大春樵。

蕭索空囊。淒涼短劍。東風吹上吳船。小飲離筵。春潮綠到津亭。故人攜手河梁別。說歸期、輒語丁寧。指家山、一笠浮空。翠樹冥冥。而今圓合煙湖夢。便蘭成身世。不怨飄零。怕到鱸鄉。迷離卻又愁醒。錢唐好去尋蘇小。覆銀沙、柳線搓青。聽船娘、欸乃煙歌。唱入西泠。

夜行船

吹過新煙花漸退。砑羅裙、記拖春水。寂寂屏空。愔愔琴瘦。閒了脂箱粉碓。燕子梁閒同夢睡。阻輕寒、一層紗外。翠被篝香。銀釭分火。借與薄烘清淚。

望湘人

途中寄羽素女兄暨蘭厓竹畦兩弟

望蒼茫暝色。淒黯暮陰。旅愁飛滿天際。短檠搖煙。欹帆翦雨。獨自枕樓斜倚。荷葉跳珠。蒲梢戛玉。一星星淚。便荒干、芳艸如塵。何似謝池

夢裏。除是自家兄弟。料逢迎到處。也無情味。作客天涯。況有誰爲知己。廨屋苔荒。湖田石瘦。何日方成歸計。願釣取。小鯉銜書。遠溯浙江潮尾。

思佳客

湖樓晚眺

不上高樓望眼遮。凭闌今日接天涯。新秋雲似羅衣薄。遠水帆如紙簀斜。魚任買。酒堪賒。湖邊三兩是漁家。鷺鷥只戀枯荷葉。不傍前汀紅蓼花。

高陽臺

爲嚴脩能上舍題西泠載月圖

水碧分雲。煙青畫樹。嫩晴初上犀鉤。盼到星期。涼花開了牽牛。一匳湖水圓如鏡。說死央近也言愁。上眉尖。翠冷吳山。澹更宜秋。西泠

橋外歌船去。羨有人波路。載月同游。笑折荷衣。幽題象筆曾搜。空齋
莫戀。藤蘿雨。恐斜枝墜向簷頭。君姬人香脩有簷花圖題者甚衆。溯蘋汀。好趁烏篷。
莫負紅樓。

虞美人

新秋漫賦

曲廊欹几平鋪簟。一水圍三面。可憐閒煞好房櫳。卻值荷花多病近
西風。簷前又上弓弓月。晚傍闌干立。死央生小忒聰明。看他水晶
眠夢幾時醒。

齊天樂

爲華秋槎司馬題北山旅舍圖

寓公門徑幽閒極。相鄰段家橋畔。屋向猿租。樓分鶴住。合署秋聲山
館。夕陽紅斷。看塔影橫斜。倚來天半。鳴脚初黃。打頭落葉一巾岸。

生涯莫悵飄轉。有明湖煙月。付與句管。瘦竹千竿。團焦一笠。嵐翠檐
閒吹滿。蕭疏鬢短。勝行旅長途。征塵未浣。水石涼邊。畫圖先我占。

聲聲慢

余與蘭邨往來白下。忽忽一載。今夏語於西湖。泊舟荷花中。
譚謙竟日。視夕陽著山額。始各分櫂。惟念倉山伴侶如良甫。
伯夔皆不在座。爲可惜也。

葛嶺浮青。蘇隄浸碧。水鄉小占漚家。門外員流。柁痕界斷銀沙。人眠
孤山涼雨。憶吟朋。蒼鬢天涯。湖邊路。老魚鏡底。吹聚蘋花。好浣征
衫塵土。算眉棱笑展。不負年華。苦咽冰醪。荷筒香冷重賒。銷得雙鬟
低拜。旗亭句。應勝籠紗。催客去。恁恩恩歸櫂日斜。

百字令

爲郭頻伽題春山薤玉圖